

102 Auk þessa grunngjalds skal greiða kr. 10.00 af hverju þúsundi króna af brunabótamati húsa og mannvirkja. Í útreikningi á heimtaugargjaldi skal sleppa hálfu þúsundi eða minna af brunabótamati, en ella hækka upp í heilt þúsund.

Ef brunabótamat á húsi er gamalt, getur rafveitunefnd samrýmt það nýju mati og miðað heimtaugargjaldið við það mat.

Sé lengd jarðlínuheimtaugar meiri en 25 metrar og loftlínuheimtaugar meiri en 60 metrar og (eða) gildleiki víra meiri en 2×70 mm², skal húseigandi greiða allan kostnað af því, sem fram yfir er.

Ef lagðar eru fleiri en ein heimtaug að sama húsi, skal húseigandi greiða allan kostnað af síðari heimtaug eftir reikningi.

Heimtaugargjaldið fellur í gjalddaga, þegar uppsetningu taugar er lokið.

IV. OPNUNARGJALD

a. Vanskil.

Hafi gjald samkvæmt gjaldskrá þessari eigi verið greitt, svo að til lokunar hafi komið fyrir veitu, skal taka gjald fyrir enduropnun 10 krónur.

b. Óleyfileg vör.

Ef fundin eru óleyfileg eða of stór vör við skoðun, skal veitunni lokað tafarlaust, og verður hún ekki enduropnuð, fyrr en notandinn hefur greitt 10 króna gjald til gjaldkera rafveitunnar.

Hreppsnefnd er heimilt að hækka eða lækka gjöld, sem ákveðin eru í 1. kafla þessarar gjaldskrár um allt að 20% án sérstakrar staðfestingar ráðuneytisins, enda auglýsi hreppsnefndin breytinguna í Lögbirtingablaðinu, áður en til hennar kemur.

Gjaldskrá þessi staðfestist hér með samkvæmt vatnalögum, nr. 15 20. júní 1923, og raforkulögum, nr. 12 2. apríl 1946, til þess að öðlast gildi þegar í stað, og birtist til eftirbreytni öllum þeim, sem hlut eiga að máli.

Atvinnumálaráðuneytið, 9. ágúst 1948.

Bjarni Ásgeirsson.

Þorv. K. Þorsteinsson.

103

19. ágúst

REGLUGERÐ

um eftirlit með innflutningi plantna o. fl.

1. gr.

Lifandi plöntur og plöntuhluta, ásamt mold, sem við þær loðir, t. d. tré, runna, fjölarar jurtir, grænmeti með rót, lauka, kartöflur og önnur hnýði, kál, jurtir til gróðursetningar, pottajurtir o. s. frv., má því aðeins flytja til landsins, að þeim fylgi heilbrigðisvottorð frá opinberri eftirlitsstofnun með jurtasjúkdómum í framleiðslulandinu. Skal vottorðið afhent tollgæzlumanni á innflutningsstaðnum. Mosi, vatnajurtir, stýfður Asparagus og ætisveppir eru undanþegin þessum ákvæðum. Innflutningur moldar, jurtaleifa og búfjáraburðar er bannaður.

2. gr.

Heilbrigðisvottorð skal fylgja farmbréfum og vera gefið út ekki meira en mánuði áður en varan er send frá framleiðslulandinu.

Vottorðið skal gefa fullar upplýsingar um:

- a. Tölu stykkja í sendingunni, umbúðir, þunga, merki og númer.
- b. Tegundir plantna eða plöntuhluta í sendingunni, með greinilegum nöfnum.
- c. Ræktunarstað og nafn framleiðanda og hvar varan er búin til sendingar.
- d. Nafn og heimilisfang móttakanda vörunnar.
- e. Hvenær varan er send frá útflutningsstað, á hvern hátt og hvaða leið, svo og nafn á innflutningsstað.
- f. Að land það, sem plönturnar hafa verið ræktaðar á, hafi á ræktunartímanum verið háð opinberu eftirliti með jurtasjúkdóminum.
- g. Að ræktunarstaður plantnanna sé laus við vörtupest kartaflna (*Synchytrium endobioticum*), kartöfluorm (*Heterodera Scachtii*) og kartöflubjöllu (*Leptinotarsa decemlineata*) og sé að minnsta kosti í 5 km fjarlægð frá stöðum, þar sem vörtupestar eða kartöfluorms hefur orðið vart síðustu 5 árin, og að minnsta kosti í 50 km fjarlægð frá stöðum, þar sem kartöflubjöllu hefur orðið vart síðustu 5 árin.

Vottorðið skal vera á ensku, þýzku eða frönsku (eða fylgja því þýðing á einhverju þeirra mála). Það skal vera innsiglað eða stimplað með hinu opinbera innsigli eða stimpli hlutaðeigandi jurtaeftirlitsstofnunar.

3. gr.

- a. Búnaðardeild atvinnudeildar háskólans annast eftirlit með innflutningi plantna og plöntuhluta samkvæmt reglugerð þessari.
- b. Þegar sending kemur til landsins skal tollgæzlan gera Búnaðardeildinni viðvart. Hún athugar vottorð þau, er fylgja vörunni. Séu þau í samræmi við gildandi ákvæði, staðfestir Búnaðardeildin með áritun, að svo sé og að innflutningur vörunnar sé leyfilegur. Gjald fyrir áritun skal vera kr. 10.00 fyrir sendingu hverja. Rennur gjaldið til Búnaðardeildar atvinnudeildar háskólans.
- c. Ef ástæða þykir til framkvæmir Búnaðardeildin skoðun á vörunni. Skal innflytjandi láta í té ókeypis alla nauðsynlega aðstoð við skoðunina.
- d. Vanti vottorð eða sé það ekki í samræmi við reglugerð þessa, úrskurðar Búnaðardeildin hvort vöruna megi flytja inn eða ekki. Leyfi hún ekki innflutning, skal varan kyrrsett í skipi því eða flutningataeki, er flutti hana til landsins, og endursend með því á kostnað innflytjanda.
- e. Sé óumflýjanlegt að flytja vöruna í land, skal hún endursend með fyrstu ferð. Búnaðardeildin skal þá hafa eftirlit með uppskipun, geymslu og endursendingu vörunnar.

Innflytjandi greiðir allan kostnað, er af geymslu og endursendingu vörunnar leiðir.

- f. Sé þess eigi kostur að endursenda vöruna, svo sem fyrir er mælt í staflið d og e, skal Búnaðardeildin láta ónýta hana á kostnað innflytjanda.

4. gr.

Varan skal fyrst flutt til Reykjavíkur til eftirlits. Samt getur landbúnaðarráðuneytið í samráði við Búnaðardeild atvinnudeildar háskólans, veitt undanþágu frá því ákvæði, enda sé eftirlitið framkvæmt eftir sem áður.

5. gr.

Innflutningur gulróta, persille, selleri, steinseljurótar, partinaks, kerfils og annarra sveipjurta er því aðeins heimill, að varan sé sóthreinsuð í framleiðslulandinu til varnar því, að gulrótaflugan (*Psila rosae*) flytjist með henni.

Leyfilegt er að flytja inn lauka og skrautjurtahnýði frá Hollandi og Belgíu, þótt þau lönd geti ekki fullnægt skilyrðum 2. gr. þessarar reglugerðar, ef eftirfarandi skilyrðum er fullnægt:

- a. Vöruna má aðeins flytja inn á tímabilinu frá 1. september til 30. apríl ár hvert.
- b. Vörunni skal fylgja vottorð frá opinberri eftirlitsstofnun með jurtasjúkdómum í framleiðslulandinu að varan sé sótthreinsuð með DDT-dufti eða öðru jafngildu skordýraeyðandi lyfi, áður en hún er skoðuð og send úr landi. Skal standa sótthreinsað (desinfected) á vottorðinu, ásamt stimpli eftirlitsins.
- c. Enn fremur skal vottað, að allir kartöfluakrar á ræktunarstaðnum og umhverfis í að minnsta kosti 10 km fjarlægð hafi verið úðaðir eða duftdreifðir með arsenati eða jafngildu lyfi, sumarið sem laukar þeir og hýði, sem um er að ræða, voru ræktaðir.

7. gr.

Landbúnaðarráðherra getur, ef nauðsyn krefur, veitt Grænmetisverzlun ríkisins undanþágu frá ákvæðum reglugerðar þessarar, varðandi innflutning kartaflna og algengustu tegunda grænmetis, á þann hátt og með þeim skilyrðum, er landbúnaðarráðuneytið setur í hvert sinn, enda skal í öllu gætt fyllstu varúðar við innflutning og sölu vörunnar.

Reglugerð þessi er sett samkvæmt lögum nr. 17 31. maí 1927, um varnir gegn sýkingu nytjajurta, til að öðlast gildi 1. september 1948, og birtist til eftirbreytni öllum þeim, sem hlut eiga að máli.

Landbúnaðarráðuneytið, 19. ágúst 1948.

Bjarni Ásgeirsson.

Árni G. Eylands.

REGLUGERÐ

um fjárframlög ríkisins til fjárskipta, samkvæmt VI. kafla laga nr. 44 9. maí 1947.

1. gr.

Sauðfjárjúkdómanefnd úrskurðar um rétt fjáreigenda til bóta úr rikissjóði vegna fjárskipta eftir þessum meginreglum:

1. Framlag ríkisins vegna fjárskipta, sem fram fóru á árinu 1947 og fram eiga að fara árið 1948, skal yfirleitt miðað við fjártölu eiganda samkvæmt skattframtali á árinu 1946. Vegna fjárskipta, sem síðar fara fram, skal á sama hátt miðað við fjártölu eigenda samkvæmt skattframtali tveimur árum áður en niðurskurður fer fram.
2. Réttur dánarbúa til bóta vegna fjárskipta yfirfærast á erfingja ef þeir halda áfram búskap á svæðinu.
3. Nú hefur maður átt lögheimili utan fjárskiptasvæðis, en hefur haft þar ábúð á jörð og rekið sauðfjárþú að minnsta kosti tvö ár áður en fjárskipti fara fram, og hefur þá búið allan sama rétt og fjáreigandi búsettur á svæðinu, enda haldi búið áfram starfsemi með svipuðum hætti og áður.
4. Ef verulegar breytingar hafa orðið á fjártölu fjáreiganda næstu tvö ár á undan niðurskurði vegna mikils lambaupplendis, kaupa, slátrunar eða sölu sauðfjár á þeim árum, má sauðfjárjúkdómanefnd taka tillit til þess við ákvörðun bóta-skyldrar fjártölu aðila. Skal þess vandlega gætt, að sömu kindur séu ekki taldar oftar en einu sinni til bótaréttar.